



◆ **Gillermo Etxeberria** ◆ Xalbador ikastegiko irakaslea

«Une gogorrak pasatu izan ditugu luzaz noraezean ibili ginelarik»

Gillermo Etxeberria euskarazko irakaslea da Xalbador Ikastegian. Seaskako bigarren mailaren irekitzearen une guztiak bizi izan ditu. Hemezortzi urteetako gora-beherak kontatu dizkigu.

■ **Duela hamar urte, Kanboko Xalbador Ikastegia erosi zenuen bigarren maila aterbetzeko. Zergatik etxea erosteko erabakia hartu zenuten?**

Seaskako kideek bozkatu zuten bigarren maila irekitzeko printzipioa 1979an eta 1980rako sartzeari egin genuen Donibane-Lohitzunen. Ondoko urtean, Baionara joan ginen eta hiru urte han pasatu ondoren Kanbora etorri ginen 1983an. Garai horretan, Credit Lyonnais bankuak etxea alokatzen zuen eta bakantzetan bakarrik erabiltzen zuen. Guk, berriaz, alokatzen genuen ikasturte osoan. Orduan, urtero bi aldiz dena hustu behar genuen: mahainak, kadirak, liburuak eta dena, eta eramaten genituen Arnagako lokal batera. Jadanik erakuntza txikia gelditzen zen eta hasi ginen pentsatzen zerbait egin behar zela. Dirurik ez zegoen, Seaskak aski lan bazuen dirua ateratzen funtzionamendurako eta orduan zerbait berezia egin behar genuen bigarren maila garatzeko. Herri Urrats egitea hasi zen pentsatzen 1984an diru pixka bat ateratzeko eta une berean bigarren maila berri bati pentsatzen ari zen jendea. Beste erakuntza berri baten egiteko planoak prestatu genituen 1986rako.

■ **Ez zenuten asmorik Kanboko eraikinaz balliatzeko?**

Garai horretan bankuak erabiltzen zuen etxea udan eta gutxiz txikiegia zen. Bigarren maila bat behar zen Ipar Euskal Herri guztirako eta erdi gunean kokatu behar genuen. Lur eder batzuk atxeman genituen Hazparnen, baina joan ginelarik ikustera jabea hil berria zen. Lurrak eman zizkion elizari baina elizarekin trataturik ezin egin! Alta izugarritzko lurrak ziren... Gero hemen Kanbon, beste lur batzuk ikusi genituen Arditzean izeneko gunean eta herriarekin beste tratu bat egin genuen eta lehen harria ere ezarria ginuen beste lur batzuetan. Lehen harria pausatuta ondoren, gertatu zen Credit Lyonnais bankuak etxea utzi zuela eta salgai eman zutela orduko jabeek. Aukera baliatu genuen etxea erosteko. Erdia pagatu genuen Herri Urratsko diruarekin eta festaren inguruan egindako kanpainari esker. Beste erdia mailegatu egin genuen. Gero emeki-emeki, bigarren maila



Seaskako bigarren mailaren irekitzearen une guztiak bizi izan ditu Etxeberriak.

BOB EDME

handitu da eta eraikuntzak egitera joan gara.

■ **Bigarren mailako lehen urteak ziren. Zailtasunak izan ziren ikasleak izateko?**

Gurasoentzat, lehen urrats handia izan zen haurra ikastolan sartzea. Ondotik, bigarrena izan zen lehen mailan jarraitzea guraso ainitz izitzen baitziren. Ezagutu zuten irakaskuntza sistema bakarra osoki frantsesez egiten zen eta gizarteko ateak irekitzen zituen sistema bakartzat jo zuten. Jende asko izitu egiten zuen eta eskolatik haurrak ateratzen zituzten lehen mailara pasatzera koan. Beste urrats bat izan zen bigarren-maila irekitzea eta garai horretan ikasle ainitz ikastolatik ateratzen ziren 11 urtetan. Hala ere, bigarren maila ireki zenean, ama eskolatik lehen mailarako urratsa argia zen guraso gehienentzat. Gero beste urrats bat izan zen bosgarrenetik laugarrenera baina bereziki lizeoan sartzeko. Hirugarren urte arte bai, baina hortik aurrera... Eta horrela pasatu ditugu bizpahiru urte bigarrena egin, lehena ere bai, eta gero berriaz hirugarrenera pasatzen, azkenik batxilergora heldu arte duela lauostu urte. Zikloa

amaituz geroztik, geroz eta haur gehiago joaten dira ikasketen bururaino.

■ **Egun gauzak errazkiago pasatzen dira?**

Ikasleak aisez gehiago sartzen dira bigarren mailan eta lehen mailan sartu ziren ikasle gehienak bururaino joaten dira. Azken kurtsoetan, bosgarren eta seigarrenean, ainitz ikasle bada aurten eta heldu den urtean sartuko dira oraino gehiago.

■ **Eta lizeoan jarraitzeko ez da zailtasunik?**

Beste arazo bat pausatzen da sail horretan. Orain arte zientzia eta letrak zikloak bakarrik eskaini ditugu, batxilergo orokorrari lehentasuna emanez. Nahi genuke beste sail bat ireki, ES Ekonomikoa eta Gizarte saila, baina Hezkunde nazionalak ez digu eskaintzen inongo formakuntza teknikorik edo BEPrik.

■ **Kolegioa eta lizeoaren bereizketak aldaketa handia izan zen ikasleentzat eta irakasleentzat?**

Eskaintako toki horrek batez ere du eragin aldaketa handia. Ikasleak egokitzen ari dira tokia, baina hastapenean oso gogorra izan da hainbat arrazoiengatik.

Noraezean ibiltzen balira bezala ari ziren hasieran, toki finkorik gabe, eta horra eraman ondotik zaila zen egokitzea. Eskaintako gelak jende helduentzat eginak dira, bizpahiru oren ikasten pasatzeko. Aldiz, lizeoko ikasleek beren biziaren parte handi bat eskolan pasatzen dute. Orduan, behar dute eremu bat jostatzeko, pausatzeko eta eremu hori eskas da. Izugarritzko jauzia izan zen, hemendik joan ondoren. Nahiz eta toki txikia eta murrizta iruditu han ez zuten deus, eta izugarriko kontrastea eta kolpea izan zen. Baina emeki-emeki, egokitu dira. Ikaragarria da pertsonaren gaitasuna edozoin bizi baldintzari egokitzeko.

■ **Pedagogia mailan, ikasle zaharrenak eta gazteenak bereizteak ez du ondorioz izan?**

Horrelako egoerak aldi onak eta aldi txarrak ditu, baina guretzat egokiago zen horrelako banaketa egitea. Bakoitza bere bizi-lasaia egiten ari da. Bestenaz baziren milaka gauza kolegioan ezin egin zitezkeenak lizeoa hor zelako eta alderantziz. Esate baterako, lizeoko ikasleak bazituzten txikigoek ez zituzten eskubideak. Orduan eremuak banatu behar ziren eta barne arautegi desberdina egin genituen, nahiz eta toki berean izan.

■ **Bigarren maila sortu denetik, gutxi gora-behera zenbat ikasle pasatu dira Xalbador Ikastegitik?**

Ez dakit xuxen. Urtero ikasle ohien bazkariak antolatzen dira eta 200 ikaslelik gora biltzen dira. Baina ez dakit noiz geratu ziren bigarren mailan eta gehienek ez dute zikloa osorik egin. Azken urteotan bakarrik, 60 ikaslelik gora pasatu dira batxilergotik esate baterako.

■ **Zer dira zure oroitzapen txarrenak?**

Zorionez une txarrak ahazteko gaitasun handia dugu. Momentu zailak pasatu izan ditugu noraezean ibiltzen ginelarik, puxken aldatzen, eraikina txikiegia zelarik eta beste aukerarik gabe, eta abar. Batzuetan ekainean heldu ginen eta ikusten genuen eraikuntza berria behar gurela baina oraindik ez gurela, nahiz eta hilaibete pare bat bakarrik gelditu egiteko.

■ **Eta oroitzapen goxoenak?**

Kanboko Xalbador Ikastegia itxura pixka batekin ikustea. Une goxoa da urtero ikustea ikasleak ikasketak bukatzen dituztenean ekainean. Beren buruaz pozik daude ez baitira besteak baino gutxiago eta erakusten du ez gara debaldetan lanean ari izan. x

La Casa
del Café

Juan Irujo S.A.

DONOSTIA



KOPY LEKU

REX-ROTARY kopiagailuak
ZERBITZU TEKNIKOA

KOPIAGAILUAK - FAXA - KOADERNATZAILEAK - GILOTINAK
PLASTIFIKAGAILUAK - ERROTULADORE ELEKTRIKOAK

Serapio Mujika, 20-7. Tel.: 39 91 57 / Faxa: 40 08 07 20016 DONOSTIA

NOROABE

- musika eskola
- musika informatika
- 3tik aurrera

Txofreko Plaza, 13 - Tel.: 943 - 29 07 39
DONOSTIA